

## SAMÞYKKT

### um fuglaveiðar í Drangey.

#### 1. gr.

Þegar vika er liðin af sumri skal öllum, sem lögheimili eiga í Skagafjarðarsýslu og Sauðárkrókskaupstað, heimilt að fara til Drangeyjar, og hafast þar við á „Fjörinni“, meðan rúm leyfir, ef þeir ætla sér að stunda svartfuglaveiði á flekum í landhelgi eyjarinnar. Umsjónarmaður eyjarinnar, sbr. 8. gr., skal gæta þess vandlega, að rúmið sé notað sem haganlegast og drýgst. Verði ágreiningur um tjaldstæði ræður úrskurður umsjónarmanns.

Með orðinu „landhelgi“ í samþykkt þessari, er átt við allt hið hefðbundna svæði umhverfis Drangey, þar sem fuglaveiði á flekum hefur verið stunduð.

#### 2. gr.

Heimilt skal mönnum, þegar þeir koma til veiðanna, að ryðja uppsátur fyrir báta sína, sem næst tjaldstæði sínu, eða þar, sem þykir hentast á „Fjörinni“, ef áður er ótekið af öðrum og heldur hver sínu uppsátri þá vertíð. Séu 2 för í félagi, er formaður skyldur til að setja annað farið upp fyrir hitt, ef annarra för fá eigi viðunanlegt uppsátur að öðrum kosti. Verði ágreiningur út af uppsátri, ræður úrskurður umsjónarmanns.

#### 3. gr.

Allir skulu skyldir til að fara út að vitja um niðurstöður sínar á sama tíma, tvisvar í hverjum sólarhring eftir því sem formenn og umsjónarmaður koma sér saman um.

Bannað er að nota lifandi fugl að bandingja. Ávallt þá er veðurspá eða veðurútlit boðar hindrun umvitjana, skal leitast við að leysa af fleka eða snúa þeim við. Umsjónarmanni er skylt að sjá um, að þetta boð og bann sé haldið.

#### 4. gr.

Öll byssuskot eru stranglega bönnuð í eygni og umhverfis hana innan tveggja kílómetra fjarlægðar frá strönd eyjarinnar, að meðtaldri „Kerlingunni“, á tímabilinu frá 1. marzmánaðar til 20. júlímánaðar.

Aldrei má skjóta fugla hvorki í lóðhelgi Drangeyjar, í Drangeyjarbjörgum né í „Kerlingunni“ né heldur skjóta í björgin, þótt auð séu af fugli.

Þó skal með samráði við umsjónarmann vera heimilt að skjóta gripfugl, er leggst til skemmda á veiði manna, enda brjóti það ekki í bág við fuglafriðunarlög.

#### 5. gr.

Þeir, sem róa til fiskjar frá eygni, skulu svo sem kostur er á forðast að stygga fuglinn frá niðurstöðunum. Einnig er bannað að leggja fiskilóð innan um niðurstöðurnar, svo og að fiska þar á handfæri utan umvitjunartíma.

#### 6. gr.

Hver maður, sem stundar fuglaveiðar á fleka við Drangey eina viku eða lengur, skal greiða í fjörutoll 25 krónur. Sama gjald greiðist fyrir hvern bát, en hafi skipshöfn aukafar, — fuglfar — greiðist fyrir það 15 krónur. Fjörutollinn ber formanni hverjum að greiða fyrir sig og sína skipshöfn, þá er þeir hafa stundað veiði við eyna í eina viku.

## 7. gr.

59

17. maí

Sýslunefndin eða sýslunefndaroddviti byggir eyna til þriggja ára í senn til eggjatöku og gefur oddviti sýslunefndar leiguliða byggingarbréf, sem skýrt tekur fram, hvað það er, sem byggt er, til hvað langs tíma og með hvaða skyldum. Skyldur er leiguliði að hreinsa bjargið yfir „Fjörinni“ og annars staðar þar sem tjöld eru sett undir því, gegn gjaldi, er nemur allt að  $\frac{1}{4}$  hluta af eftirgjaldi hans. Skal hreinsunin fara fram á þeim tíma, sem umsjónarmaður telur hentugast. Leiguliða skal bannað að stunda eggjatöku lengur en til laugardagskvölds þá sjö vikur eru af sumri. Leiguliða skal skylt að taka ritsuegg og fýlsegg úr björgum eyjarinnar eftir því sem hann getur við komið. Eftirgjald það, sem leiguliða ber að greiða auk framangreindrar þóknunar, greiðist oddvita sýslunefndar fyrir lok vertíðar ár hvert.

## 8. gr.

Nefnd sú, er stjórnar málefnum Drangeyjar samkvæmt eignaskiptasamningi, útvegar á ári hverju umsjónarmann, sem hefur á hendi eftirlit með því, að þeir, sem stunda veiði við eyna, og leiguliði eggversins hlýði fyrirmælum samþykktar þessarar. Ber umsjónarmanni að gæta þess vandlega, að fugl sé ekki veiddur í bjarginu né í „Kerlingunni“ með speldum, háfum, flekum eða á annan hátt. Ekki má heldur drepa lunda eða taka egg hans uppi á eyinni. Enn fremur hefur umsjónarmaður á hendi innheimtu á gjaldi því, er ræðir um í 6. gr. Einnig skal hann heimta skýrslu um fuglaveiði af formanni hverjum, eftir hverja viku, svo og af eggjatökumanni skýrslu um tölu eggja, þá er eggjasigi er lokið.

Umsjónarmaður semur því næst aðalskýrslu um fuglaveiði og eggjatöku, sem hann skilar oddvita sýslunefndar ásamt fjörotollum, fyrir lok júlímánaðar ár hvert. Fyrir starf sitt fær umsjónarmaður hæfilega þóknun, sem greiðist af tekjum eyjarinnar.

## 9. gr.

Heimilt er sýslunefndinni, ef henni þykir ástæða til, að gera sérstakar ráðstafanir í því skyni að útrýma úr eyinni ritsu og öðrum vargfugli, sem spillir svartfuglaveiði við eyna, þó svo að gildandi friðunarlög séu haldin.

## 10. gr.

Friðlýst skal eyinni á öllum manntalsþingum sýslunnar fyrir öllum óleyfilegum afnotum. Öll landspell á eyinni eða skemmdir á festum þeim, sem henni fylgja og mönnum verður um kennt, varða sektum og skaðabótum.

## 11. gr.

Brot gegn ákvæðum samþykktar þessarar varða sektum allt að 2000 krónum. Lágmarkssekt fyrir skot í Drangeyjarbjörg og Kerlinguna skal vera 500 krónur. Að öðru leyti skulu refsíákvæði 33. gr. gildandi laga um fuglaveiðar og fuglafriðun gilda að því er tekur til samþykktar þessarar og eftir því, sem við á, svo og um upptöku á ólöglegu veiðifangi og hagnaði af veiði og á veiðitækjum.

## 12. gr.

Mál, sem rísa út af brotum gegn samþykkt þessari, skulu rekin að hætti opinberra mála.

Samþykkt þessi öðlast þegar gildi og gildir til 1. marz 1956.

*Menntamálaráðuneytið, 17. maí 1955.*

**Bjarni Benediktsson.**

*Birgir Thorlacius.*